

于湖居士文集

七

于湖居士文集卷第十九

內制



戒諭將臣詔

朕若稽燕謀寶用儉德駕鼓車以走馬示
輟游田之娛集書囊爲殿惟蓋先敦朴之
務至於耳目之玩口腹之珍非甲令之常
共雖一毫而莫取欲使表端而影正風流
而令行化貪婪哀刻之徒爲禮義廉耻之
俗而朕行未足以厲世威弗嚴於訓姦乃
茲內外之臣尚狃故常之習乾沒無藝誅
求靡厭遂令軍旅之間猶須餽賂之致剥
士卒之膏血充權貴之苞苴使彼抱飢寒
之憂而此供宴樂之費有爲若是於汝安
乎當亟寘於典刑尚申加於告戒繼今以
往令出惟行其聽朕言各循汝守任將帥
者無市恩以貨賄第令戈甲之精居左右
者宜律己以憲章皆知簠簋之飾黨不俊
而慢命將無赦而必誅各迪保身之明勿
貽噬臍之悔

又

朕祇若慈闈覃思邊事靡憚焦勞之極欲
臻康靖之期往者披輿地之圖愴中原之
俗皆吾赤子何忍誅夷申飭使輶往脩邦
聘而金國都元帥僕散忠義怙不臣之惡
扶震主之威禮繫行人拘之圜土旣脅降
之不可即顓命而遣還揆彼政之如斯緊
不亡而何待但以並邊之戍行役彌年風
霜凌厲而朕方席廣夏之居藜藿不充而
朕則享太官之膳所以當饋而歎未明求
衣朕身在九重之中而心留窮塞之上欲
馳單騎躬勞六師撫摩瘡痍均服勞苦而
百辟卿士發言盈廷止或尼之莫孚朕指
爰命丞相敬代朕行夫佳兵者不祥好生
者大德朕豈忍以一時之憤而遂忽長世
之撫當謹守於封疆益繕脩於兵械使士
忘露宿之苦而將有死綏之心恃有待而
不來寧貪功而起釁儻穹旻之悔禍則蕩
定之有時咨爾庶方咸體茲意

太上皇帝本命青詞

丕承聖緒祇奉慈顏當元命之臨辰有珍

符之錫羨爰披寶笈恭扣叢霄願鑒寧親之誠益聞受帝之祉

朱表

馳誠霄極衍慶慈闈祇荷博臨告成釐事無疆之壽永承太上之休有道之長更增皇宋之曆

外制

沈該落職制

君人臨照百官蓋欲其精白以承休德宰輔儀刑四海豈宜以寵利而居成功繫予

既老之臣自喪不貪之寶其還顯秩用厭師虞具官某頃以藩條擢聞機政惟人求舊謂文武可以憲邦秉國之均何風采不如治郡朕猶虛已日佇告猷精神強而折衝未聞宏略血氣衰而戒得似減廉轂既已乖鼎鼐之調始欲掛衣冠而去雖曲全於體貌乃荐致於抨彈其鑄秘殿之華俾即安車之佚噫君子慎始防嫌疑於未然貴臣抵辜尚遷就而爲諱慨往愆之莫拯期晚節以自全

頁頁 沈調落職降官制

舜賓世族冒賄有四凶之流商制官刑徇
貝謹十愆之戒疇時民蠹尚佚邦誅具官
示素無廉稱竊造邇列過而或改謂且收
之桑榆老以益貪殆弗盈於溪壑永念七
閩之都會不堪再歲之誅求貿遷欲盡於
毫釐吞噬不遺於膏血姦賊狼籍公論沸
騰慨而同氣之私姑貫投荒之罰亟鑄美
職併奪崇階其祗服於隆寬尚少懲於往
謬

陳誠之降官制

懷歸有畏於簡書恩始從於均佚試可弗
成於績用罰難追於黜幽既辜體貌之私
宜在譴何之域具官某始由科第寢陟邇
聯意其簡默而不言則亦深沉而可用擢
持兵柄游閱歲華退食自公宜赴功而樂
事括囊無譽第持祿以保躬逮庶務之稍
繁即抗言而請去彈章既上寵數宜鐫噫
爲祈父之瓜牙初期陳力視秦人之肥瘠
良負虛懷服此寬洪無忘循省

陳靖轉遙郡承宣使制

王宮之官朝夕勤事積而至於三年之久可無褒哉具官某明敏忠恪服在此位稽日第勞是應遷法夫自刺史而上皆武著之高選雖踰其祿苟非尤恩不以叙進况承流宣化名秩益顯尚思稱塞無或不祗

錢愷降授舒州觀察使宮觀制

昭德塞違國自貴近始厲名砥節士以廉耻張豈予肺腑之懿親乃爲龍斷之賤行此而可貫後復何懲昭化軍承宣使錢愷胄出勲門慶承主第雖武爵是襲亦俎豆之常聞而市道自居致簞簋之不飾欲爾私藏之富墮予軍政之嚴考核具陳聽聞實駭其上承流之秩仍鑄奉謁之儀往即外祠姑惟薄罰

蔣璨降官制

朕惡人之欺而盡下以恕過誤觸罪則當自歸詆讟遂非其可亡罰具官某服在禁路出臨輔藩見謂老成亦所倚信乃吏姦之不察致臺劾之上聞深惟失職之愆姑

往賜書之問弗務兢懼更爲誕謾詭陳摘
伏之言前易刻章之日作僞之拙欲蓋而
彰聊從一秩之鑄尚屈常刑之舉服予寬
典新爾後圖

謝伋徐康降官制

部刺史檢吏姦職也汝屬縣令亡狀致吾
御史以爲言汝失職已命汝自列庶或懲
後不務引過更肆誕謾誰爲若謀謬戾如
此鑄官一列尚服寬恩

韓元吉除度支郎中制

具官某度支之職前世以宰相兼之蓋發
歛均節輕重取予於是乎在今名存而實
廢矣視券牘之成謹其數出納之而已爾
名臣之世率義好脩淹貫文藝綜練世故
攝司之久肆以命爾其爲朕思所以振其
職者

馮巽之除刑部郎官制

具官某獄重事也獄成而罪疑則上之於
朝而刑曹郎參決而死生之其不可輕付
如此爾以明法稱於文無害使在茲位孰

曰不宜益務詳審以振而職

晁公武除監察御史制

御史府寄朕耳目苟非其人不在茲選爾學有本原才可經濟萬里來朝朕蓋得之於一見之初小試粉省彌有華問冠豸在列肅我天憲朕所親擢爾往欽哉

呂摺除司農寺丞制

具官某惟爾先正有大勲勞在王室朕顧懷其世思有以嘉報之而爾亦自將其身蹈履繩檢擢丞農扈以試爾能益務祗恪庸稱恩遇

二百五十四

二湖十九

七

文俊

查籥除夔州路運判制

蜀自兵興困於征調夔子之國地境埆而民尤貧朕思得賢使者以撫之爾文學議論見推時輩久在近服宜知朕指將輸之任輟汝以行往其布宣朕不遐棄

黃仁榮除兩浙路運副制

畿內漕視他路選尤重爾以通才婁更煩使輟自泉府使服故官往其欽哉嗣有褒擢

張德遠除利州路提刑制

具官某蜀去朝廷遠治獄之吏或不得其平民且無告爾久更事任見謂明審其爲朕典一道祥刑之寄惟公其心以察郡縣使毋濫繫毋賄成毋上下其手則汝爲稱職

葉謙亨除浙西提刑制

部使者之在畿甸歲時朝集得以其職自達于上視中都官蓋等耳爾嘗執簡柱下掌誥西掖出治劇郡即有能稱按刑江東獄不冤濫徒以自近宜知朕指佇爾來廷將有褒陟

韓彥直除淮東提舉制

惟爾先世有大勲勞在王室朕顧懷其後思有以褒報之而丞相亦言爾才可錄也淮東煮鹽之利供國用什三命汝以使者節臨之其體朕意思振厥職

曹紱除湖北提舉制

爾守近郡有循良之譽朕念湖外之民勞苦兵事故付汝以使者節往撫綏之其體

朕懷勿解于位

陳漢除直寶文閣知平江府制

平江吾股肱郡遴選所付必惟其人爾忠厚明敏所至辦治將輸畿甸成績可紀其還使者之節遂縮太守之章寶儲進直併示優寵尚體予意務安輯之

孫佑追復直徽猷閣制

朕中興之初繫汝爲良二千石所臨底績所去見思据正不回坐一本作是讒一作是以免歿身久矣風槩凜然有懷不忘肆俾甄叙延閣

寓直追加密章錄其遺孤用勸忠力

任盡言除直秘閣江淮都督府參

議官制

具官某朕命相臣以幕府臨邊凡其自從皆天下之選爾忠直強明克承厥家所居之官聲績較著必能爲朕協贊元老延閣寓直庸寵爾行尚堅一心益固吾圉

趙不溢降官制

具官某朕惡士大夫便文自營婁下告戒又嘗逐二使者一藩臣庶其知革今汝持

節所在守不稱職閱時之久而汝弗言逮同列之有云姑騰章而飾過察州如此不黜何爲聊奪一官尚祇輕典

具官某 王漢臣李大援轉官制

朕褒錄勤瘁遠臣不以廢也况周旋殿陛贊予朝覲會同之儀而司其籍者哉爾漢臣練習而疏通爾大援周慎而明敏均以積閱協于遷令廉車刺部隄賦爾秩是爲茂渥尚克欽承

能說轉官制

周官歲終則稽盥之事上下之以制其食况汝服勤宗邸七年其久全而不失是可嘉已遷官一等以答汝能

正任防禦使刺史通侍大夫至右武大夫帶遥郡同加封父母制

父

具官某父某朕惟東朝方迪遐壽誕推渥澤爰暨人親爾善積于躬有子滋貴服予武著實應恩章載侈新封俾陞官簿益綏福祉庸荷寵光

母

具官某母某氏朕承顏東朝以天下養樂人之有壽母有以表異之肆因八秩之慶茂暢恩典爾慈懿淑謹有子在官宣勞武階獲際休事申賜命綍榮其家庭往祇令名益介遐祉

橫行副使及武功大夫至修武郎
父加封制

具官某父某朕惟東朝壽祉以幸天下惟爾有子服予武階進汝一官用廣孝治尚祇譽命往迪吉康

宗室橫行至正任防禦使父母加封制
父

朕元日詔書蓋推東朝慶祉均暨天下矧予肺腑之戚也哉爾神明之支克自謹畏乃其子姓服我近班肆稽恩章俾進右秩尚其祇服茂迪遐壽

母

朕惟東朝之壽方迪無疆誕舉慶條以暨人老豈予族姓之母可稽脂澤之賜爾胄

自華閱嬪于天支有子在官宜賁新渥往
祇命服之寵益承燕喜之譽

懷安軍惠應廟昭佑侯可封昭佑
靈濟侯制

爾神父子有廟西土能赫厥靈祓除菑凶
朕蓋嘗錫之侯爵矣今部刺史又上其事
申以顯號於侯何愛

昭佑侯子靈助侯可封靈助順成
侯制

朕念蜀遠凡蜀之吏有功於吾民皆有以
表異之於神獨不然哉增賁嘉名益侈而
施

佐神安仲吉可封通濟侯制

爾神侑食惠應能贊而長以休吾民五等
之爵侯位在二又有美號焉朕之報神亦
已豐矣

采石巡檢時宣訊民致死降官制
汝職徼巡而民以掠死雖匪其私顧可弗
懲褫官一列尚謹而後

勝捷都虞候謝興換從義郎制

汝服勤戎昭既有年所其還軍候往即官
聯

都虞候姚元換授制

爾服在戎行多歷年所其還候禦易寘武
階

潘得臣男汝楫補官制

爾父為吏死寇朕既厚恤典又錄其孤所
以報也勉哉惟孝惟忠則爾父益有顯休

張建陣亡與子德普恩澤補承信

郎制

爾父死於敵錄爾以官所以報也往哉惟
孝惟忠以顯父休

王漢臣米綱折欠違程降官制

汝護貢輸乃敢不虔宿留道涂折閱什二
其還一秩姑示薄懲

樂寅孫李抃趙達不覺察過淮人

降官制

疆場之守朕所致慎爾等為吏乃或不虔
其鑄一官以厲餘者

楊慶祖李大正循資制

朕惟三歲之祀業鉅事藪前期設官是俾
典治爾以才選服勞采時殆茲告成厥有
褒進

張俊彥循資制

顯仁之喪爾與有勞其進文階益務共恪

田漑轉官制

爾捐家貲以佐國用揆之古義何愛一官

劉嗣立吳懌進書賞轉官制

先帝信書之成汝輩共勞其間可無褒哉

進書賞人吏等轉官制

屬命諸儒輯成大典汝嘗服役亦俾進官

于湖居士文集卷第十九

于湖居士文集卷第二十

表

賀 太上皇帝遜位表

斷自聖意協于天心振古所無率土同慶
中賀臣聞爲天子父寔倉皇蜀道之歸尊
太上皇亦草昧漢邦之始未有躬致垂衣
之治而獨心懷脫屣之高恭惟

太上皇帝陛下道極化元功超象外巍巍
蕩蕩繇艱難馴致於中興汲汲皇皇在底
定弗忘於無逸蓋天度聿追於 藝祖而

三

三湖集二

劉文才

深仁壹似於唐堯當乾德之方剛體離明
而繼照臣欽承謨訓結戀恩私五日起居
莫預清班之列萬年壽考但靳神筴之增

賀 今上皇帝登極表

星輝海潤方肇啓於青宮地闢天開遂丕
膺於赤紀有赫聖人之大寶於昭天下之
至公廟社逾尊華夷均慶中賀臣聞父傳
於子振古雖然天作之君若今未有載纂
開基之緒惟新受命之符恭惟

皇帝陛下博厚高明齊莊中正翼翼之心

不已蓋本躬行喁喁之望咸歸殆非人力
仰 太上復艱難之業付吾君於談笑之
間十一世而益光邁建武中興之事八百
年其增卜侈成周過曆之期臣身在侯藩
精馳觀闕朝五日而善家令胥瞻孝治之
優復兩京而還上皇更徯大勲之集

賀立皇后表

儷極之尊光于有昔齊家之訓燕及無垠
日月宣昭神人歡喜中賀 臣聞助染盛於
宗廟茲王化之攸先羞榛棗於舅姑蓋宸
居之未有於若隆興之嘉禮茂承德壽之
重歡恭惟

皇帝陛下孝始奉親恩兼睦族關雎之樂
淑女式圖陰教之修雞鳴而至寢門共致
色難之養肇興縟典丕叙彝倫臣嘉與常
僚具宣明制塗山啓夏方觀萬國之朝大
妣興周嗣上百男之頌

代摠得居士賀天申節表

珍圖錫羨方隆滋至之休誕月開祥載衍
無疆之壽照臨所暨舞蹈攸仝中賀恭惟

皇帝陛下盛德日新至仁天覆齋居節費
不爲耳目之娛屈已和隣無復甲兵之問
凡此無爲而保治蓋將守靜以延年臣濫
職外臺忻逢穀旦夔龍接武阻稱漢殿之
觴蟣蝨輸誠徒效堯封之祝

代方務德賀回鑾表

靈鋒電掃殲厥渠魁輿衛天旋格于藝祖
神人歡喜華夏尊安中賀恭惟

皇帝陛下仁配乾坤恩兼南北始結琬圭
之好欲齊民均蹈於泰和茲親革輅之征
乃黠虜自干於皇略逮訖鯢京之戮亟傳
龍駕之歸萬里提封將復漢圖之舊百重
陛戟載新兵會之朝臣屬奉清閑獲瞻睟
穆邊庭賤守莫陪飲至之觴馳道告行企
望前驅之蹕

謝曆日表

一札十行雖存故事元年正月實拜新書
景祚有開庶邦咸喜中謝恭惟

皇帝陛下堯仁宅下舜曆在躬大一統以
當天作其即位定四時而成歲敷厥庶民

肇錫嘉名深詔執事臣敢不布宣上意勸
相農功舉正於中既謹春秋之法自今以始
當觀正朔之同

謝曆日表

二年而調玉燭方洽泰和一氣之轉洪鈞
再放新曆惟朝廷則用故事在郡國實爲
寵光中謝恭惟

皇帝陛下與天爲徒體道御數協時月正
日俾民不迷自南北東西遵王之道臣敢
不建用皇極奉揚仁風于再于三勸百姓
農功之敏時億時萬祝兩宮壽紀之長

賀元正節表

元年正月實春秋謹始之時是日三朝會
圖籍貢珍之盛肇新繹典益侈闋休中賀
恭惟

皇帝陛下道本財成誠參化育羣黎百姓
欣逢治定之期君子小人各適消長之分
導迎景貺登濟中興臣猥以賤官出守外
服君門萬里雖迹遠於天朝壽觴九行徒
夢遊於帝所

代百官賀冬至節表

增泰元之筴益闔受命之符奏黃鍾之宮
丕應得天之統造庭稱壽率土均釐中賀
恭惟

皇帝陛下與神爲謀惟皇作極合八能於
前殿衆建人才書五物於保章用昭歲事
緝熙景貺敷錫羣生臣等叨列攸司欣逢
穀旦七日來復方占羲曆之祥萬壽無疆
願罄堯封之祝

代百官進玉牒成書表

帝系勒鴻燦科條於屬籍聖謨啓佑嚴訓
典於寶儲御巖廟以觀成拱朝班而稱慶
中謝竊以堯統漢緒肇派別於天潢周誥
商盤麗光躔於東壁惟昭穆親踈之有序
與文章號令之當傳歷時浸闕於編摩甫
歲悉加於纂緝必親經財幸稽春秋簡牘
之文故並建殊尤若河洛圖書之出恭惟
皇帝陛下慶繇景祚志適先猷世茂本支
襲生民之尊祖道昭歷服成下武之繼文
考仙宗皆聚此書述遺烈永爲大訓臣等

猥蒙際遇快覩休嘉麟趾振振共仰宗盟
之益茂虞書渾渾更瞻聖作之相輝

賀冬至節表

品彙慶一陽之復於時是爲仲冬王者會
萬國之朝其儀亞於獻歲中賀恭惟

皇帝陛下重明麗正敦復考中不動聲顏
豈止俟陰陽之定純受德教所以同天下
之心受福惟多知剛方長臣忻逢穀旦屬
守竹符望帝都千里而遙莫與班行之末
上吾君萬年之壽不知精爽之馳

代百官賀日蝕陰雲不見表

璿璣占象方虞辰集之差黼坐端躬遂應
離明之正喬雲密護沴氣潜消瑞揭圓精
慶由宸極中賀竊以日行有節數或戾於
經躔帝德罔愆誠乃回於穹鑒偉休符之
昭著知治道之顯融恭惟

皇帝陛下神化又新智輝旁燭容光必照
聿疑丕冒之功守實不虧坐協寅賓之度
惟聖時克先天不違臣等服在邇聯與觀
景貺珍圖疊紀仰開合璧之祥羣目共瞻

益勵傾葵之志

進登寶位銀表

受四海之圖方盛官儀之復鑄九金之鼎
敢忘牧貢之脩悵違執玉之趨祗効來琛
之獻中謝恭惟

皇帝陛下配天立極如日升明所寶惟賢
已旁求於壽雋理財以義且蓋貫於逋租
而臣職在剖符禮應奉幣侑稱觴之萬壽
知芹莢之非珍遙交戟之百重慕葵傾而
徒切所有賀登寶位銀一千兩謹遣妹夫
進士李蟾捧表管押上進冒犯天威臣無任

代百官謝賜時服表

冬祁寒而惟怨咨過軫聖神之念秋獻裘
而待放賜聿嚴典則之常手舞拜嘉篚將
示寵臣等中謝恭惟

皇帝陛下文昭經緯道極彌綸中寶儉慈
衣弋綈而率下外新制作美黻冕以御朝
乃眷周行載分齊服臣等恩均在笥德愧
章身制彼裳衣莫効馳驅之力出於機杼
當知紅織之難

進奉貢葛奏狀

厥篚織纊雖云任土之殊當暑袵絺顧是
此邦之產備齊官之三服參禹貢之九金
前件物邊幅非長經緯殊拙垂衣裳而至
治慚莫效於絲毫美黻冕以致神或見收
於巾冪謹隨狀詣闕上進以聞

謝除中書舍人表

螭坳秉筆方愧空餐鳳掖代言遽叨親擢
被身章而滋寵捧誥牘以彌驚懇避莫俞
省循增懼中謝竊以中書本命令之地舍

二百七十二

二湖集二

八

文

人典文字之官學博藝精斯能華國職清
地近豈可假人蓋有思之敏者未必暢於
事情詞之工者未必窮於理致問古今則
高崔互有所得評書詔則常揚各擅所長
世每歎其才難人亦隨於器使非夫言通
志慮識達典章絢黼黻之文邃淵源之業
則何以裁坦明之制居清切之司如臣者
才不逮人學徒泥古偶玷名於巍第俄策
足於要津屬內史之久虛俾孤蹤而代匱
方自虞於顯黜敢有望於爲真忽拜異恩

祇慙非據此蓋伏遇

皇帝陛下圖回至治綜覈羣工方將藻飾於皇猷故必網羅於衆俊雖大公之施不間踈微而小已何堪誤膺簡拔臣敢不仰承眷渥益勵操修職在絲綸寧有彌縫之助事專筆舌敢忘獻納之忠

中書舍人直學士院謝表

右輔分符初無治狀西清掌誥復冒寵除更通鰲禁之班還參豹尾之從中謝伏念臣空踈不學徼幸入官歲月推遷遂塵清

二百八十二

千湖集二一

九

劉不有

貫風波浩渺迄致煩言一收朝蹟而歸五見律筩之換尋覆蕉之夢驚曩事之皆非追視草之遊懼此生之終棄敢圖新渥遄服故官躡文石以朝趨掣宮鈴而夜直茲蓋伏遇

皇帝陛下丕膺舜曆煥緝堯章核名實以登俊髦蓋欲去虛文之害躬勤勞而詔機務益將恢遠御之圖曾是孤蹤亦叨殊獎竊謂今日論思之職豈特平時播告之修顧邊瑣之多虞繫廟筭之靡定必有隨時

制變之策以究折衝禦侮之宜造膝之言
願極陳而毋諱捐軀之誓期永報於不貲

撫州到任謝表

解荷橐於西清久隔雲霄之望分竹符於
南紀忽霑雨露之恩惟盛時無終棄之人
俾下臣有自新之路中謝伏念臣策名最
晚被眷獨優始由狴犴之餘旋遷班聯之
末驥馱備八鑿之乘何有於駑材鴛鴻參
萬玉之庭更容於鼠技惟特達盡由於親
擢果迂踈交致於人言俯危迹以屢驚悵
明恩之未報敢期宥過尚俾承流茲蓋伏
遇

皇帝陛下仁與春融道同天覆建非常之
策方任賢而使能開大公之門悉除苛而
解媯乃眷上游之古郡載收散地之羈人
臣敢不懲沸吹壘飲冰食檠求民之瘼稍
更珥筆之風勝已之私切謹佩韋之戒祇
圖來効思蓋往愆

平江府到任謝表

籲天有請願供水菽之勞易地䟽榮復畀

繭絲之託仰戴上恩之厚靡容私義之伸
中謝伏念臣開迹諸生受知 太上華涂
超躡莫匪親除憲府抨彈良由自取會真
人之御極容偏郡以承流已試無功丐閑
得劇雖自西徂東周爰執事然以小易大
是誠何心深懷顛覆之憂或誤甄收之意
茲蓋伏遇

皇帝陛下聖同 藝祖孝述 光堯廓大
度以用人欲兼致非常之士攬權綱而在
已將崇成可大之功曾是棄捐亦叨簡擢
臣謹當布宣盛澤激發懦衷澄瀚海之波
冀有因人之薄效凝清香之寢敢如平世
之偷安

潭州謝復次對表

賜以贊書還之次對敢云舊服是謂新恩
中謝伏念臣智昧一官仕嘗三已江湖遠
引自怜蹇剝之多雨露均霑獨倚乾坤之
大茲蓋伏遇

皇帝陛下緝熙聖緒駿發英猷專予奪之
柄以馭羣工明功過之使以興庶事迺如

孤迹亦預慶條臣敢不祇佩隆私益追往
咎儻有及民之效則爲報上之忠

代方務德廬州到任謝表

外閫分憂肆放明命內朝賜對載邇清光
已見荒郡割殘之餘具言聖主哀矜之意
中謝伏念臣婁膺劇寄蔑著微勞謂孤蹤
宜在於棄捐而廟論猥煩於推擇屬有負
薪之疾旣辭輓粟之行逮茲邊瑣之多虞
復俾帥藩而申命馳驅引道僂佯拜恩細
札十行亟承於漢詔土階三尺密奉於堯

卷二十一

謝表

十一

大有

言軫民之窮則使捐關市之征憫臣之病
則戒求藥物之善掩骼下度僧之牒振飢
分貢牧之金獨揆謙能曷勝隆委茲蓋伏
遇 皇帝陛下至仁惻隱盛德涵容革輅
徂征已克清於大憇玉關罷警將永洽於
泰和慨斯鋒鏑之淫夷懼以繭絲而割刻
故銓冗吏使布寬條臣敢不祇若神謨恪
恭賤職老於州縣敢圖橫草之功固我封
陲庶弭搔瓜之怨

于湖居士文集卷第二十

于湖居士文集卷第二十一

啓

代摠得居士上宰相

咎深百適敢逃齋斧之誅恩予再生願廣
覆盆之照仰止雲龍之會俯殫螻蟻之誠
伏念某晚學支離殘生寒窶躬耕自足所
願力田而逢年世祿偶霑本意爲親而捧
檄孤孽自憐於薄宦廉隅竊慕於前修慮
捶楚之莫辭實簡書之是畏諸公長者猥
借齒牙清都太微獲望旒冕退效一官於

二十一

于湖二十一

免仁

塵土投閑二紀於江湖日莫而巾柴車嘗
躬鄙事秋風之破茅屋安所莫居雖周道
如砥何有於崎危而秦網凝脂竟罹於羅
織會上聖權網之獨攬貫下臣縲紲之
非辜綴毀裂之冠裳招散離之鬼鬼冀安
晚節絕望榮途何負薪之疾未瘳而剖竹
之符狎至洊拜西州之繁使適當北鄙之
多虞申命推行掇辭莫遂念廊廟東知之
特達且關梁捍禦之闊踈釁已結於搔瓜
備初微於橫草竊厲死封之志遂忘負乘

之譏李牧之居北邊費軍租而享士營平
之破羗賊留步卒以屯田盜空狐鼠之羣
吏戢豺狼之暴周旋兩稔辛苦百爲顧績
效之未聞亦規模之粗定自嗟激烈人笑
迂踈果飛謗之交攻致劾書之趣上尚蒙
觀過俾免所居匪造化之曲成殆生全之
莫保雨流木偶所念無歸火及池魚又將
奚咎聚族近盈於千指爲氓不辨於一廛
疾病侵凌親朋棄絕固已闔門而恐懼尚
虞投隙以摧傷瀝血攄辭搏膺請命伏望
僕射相公廣好生之德察溢惡之言憫其
嘗被於使令頗亦服勞於奔走稍援溝中
之納俾留爨下之焦收父子之餘年歸田
園於故里况仄席搜羅於豪傑欲前籌開
濟於艱難有如不肖之資旣乖已試之效
儻獲洗滌於旣往庶將勸厲於方來九頓
首以自歸冀垂威聽三折肱而不悔誓報
隆私

代揔得居士上葉樞密

運璇樞於霄極方恢宏遠之圖馳玉節於

戎荒益茂綏懷之略仰止南轅之近莫陪
前駑之驅輒控絨騰冒干齋斧共惟國信
樞密德全剛大學貫淵微萬壑長松卓爾
棟梁之用九金神鼎岌然寶鎮之儲佐王
夙負於英資憂國粵從於早歲已積公台
之望浸膺旒宸之知容臺高潤色之功外
府極轉輸之効暮年上最即日召還橫榻
憲臺朝有絲繩之直持衡銓部人知水鑑
之平紬石室之圖書誦露門之簡策豈特
搢紳之歸重抑惟夷貊之知名亟自南宮
進陪西府方 睿主廣右文之治適殊鄰
修交聘之儀政須國榦之良往震天驕之
俗望龍沙而引道馴犬聚以革心何但單
于識漢相立朝之風采定應回紇懾汾陽
單騎之威容式時遄歸厥有成績聳聞廷
告滿慰具瞻伏念某邊徼微官門闌舊物
半生憂患嗟老矣以何堪末路棲遲復病
馬之爲祟婁祈哀於宰路冀得請於仙祠
茲聞大纛之還寔冀洪鈞之播受廙故里
儻容孤迹之偷安擊壤明時尚與齊民而

拜賜

代季父賀湯丞相

大號明敷真儒進拜基命宥密既用予安
天下之民疇咨登庸蓋論相迺人主之職
泰階齊色巖石具瞻恭惟僕射相公廣大
高明溫良恭儉範圍天地之業實蘊蓄於
平時黼黻河漢之文聊發揮於餘事徧歷
在廷之清貫屹爲斯道之主盟周旋回枉
之間終始端方之守抗浩浩滔天之勢愈
厲忠規切惓惓造膝之言願還威斷揭大

二

湖二

四

九

明而烜照破積陰之蔽蒙旣妙契於宸旒
將遄歸於政柄姑畀腹心之寄俾專帷幄
之謀右府本兵憺天威而遠震神樞旋極
鞏國勢以中嚴萬山瞻鰲鎮之尊一柱障
鯨波之險庸虛次輔特告昕朝衆志交孚
覬我公之爰立上心簡在揆剛日以延登
新風采於巖廊峻冠章於槐位丕建太平
之業益隆不拔之基某獲侍光躔越從早
歲方流落棲遲之已甚獨矜憐收拾之不
遺欣此餘生永歸大造若旱作雨抑多方

均被於洪休如泥在鈞豈一介獨爲之私喜

賀湯丞相

誕受冊書進登揆席星樞環極有嚴宥密之司帝鼎調元丕正弼諧之任天心克享物望交孚洪惟本朝之興垂二百載粵自右府而相才十數人趙中令以創業佐命之勲韓侍中以決策尊王之略杜正獻間暇清正而裁抑僥倖曾宣靖謹畏周密而明習憲章率皆名垂世之日星身爲國之基杖若時英輔光配前人恭惟僕射相公才全而德不形功大而心轉小惟虛以靜故能應無窮之變而不懾惟寬而栗故能處羣枉之間而不回厥惟帷幄運籌之初已著股肱惟人之望還主威於笑談之頃恢朝綱於紛紜之餘國人曰賢已恨登庸之晚大君有命聿瞻爰立之新朝廷由是以尊安天下想聞其風采渙號所暨泰亨可期有如孝祥辱在恩地大厦成矣當容戢翼之歸泰山巋然請効微塵之益竊

謂君相之遇合或繫國家之隆汙有其君而臣不足與圖功或當饋而歎息有其臣而君不能與共治或環轍以赳赳永惟感會於一時蓋亦寂寥於千載迺今之盛振古未聞 皇上勵至神而詔百官諸賢建大功而同休德疆場不聳年穀婁豐儻不及茲而有行是將無日而復可惟海內重望之所屬此門下素蘊之欲爲毋使四公得專美於前抑亦永世有甚休之譽

洪帥魏參政

九命作牧逖瞻帥閫之雄一廛爲氓近接宮墻之峻念昔播大鈞之塊坳乃今依厦屋之帡幪恭馳只尺之書丕承進退之命伏念某鄉持末學輒冒首科觸宰路之虞羅陷親庭於狴犴飈回霧塞方蔽羣儉地闢天開俄登衆輔乃 聖主類郊之二日辱明公造膝之一言可但釋纍於詔獄之寃且復育材於儒館之邃恩私厚矣報效缺然謂當少著於事功則亦仰疇於知遇冥行自信幽黜固宜奉香火之祠遄趨並

塞遡旌麾之府夔隔重江未容望履於和
門姑欲卜居於德里是所願也敢私布之
恭惟某官道緝聖傳功熙帝載三能之麗
天極煌煌列宿之躔四溟之經地維浩浩
百川之委若稽獨化之始登翊萬微之繁
凡當時廊廟之所行雖走卒兒童之能誦
青天白日靡容刻繪之工赤舄袞衣但冀
旋歸之速方將芘天下之寒士夫豈拒吾
儕之小人載惟留落之蹤架極依歸之悰
仰窺宏達必遂矜容開商邦三面之羅已

三五五

三湖二十一

一

及仁

涵大惠築楊子一區之宅終藉餘休

王樞密

運璇樞於霄極夙瞻命袞之崇分玉鑰於
神臯今仰建牙之近屬有負薪之疾未脩
歛版之恭敢徹書函冒干齋斧共惟某官
功熙帝載道覺民先清介之風凜然表世
而獨立孝友之行信矣行人之所難竊觀
聖君簡注之深率由明公誠一之著異寵
超躋於羣辟斯文冠絕於當時紫誥黃麻
士知模楷丹心白髮國有著龜丕釐宥密

之司誕付安危之寄造膝九重之議固遠
臣莫得而聞捐軀萬里之行雖黠虜亦爲
之懾方佇登庸之拜俄聞均佚之歸西都
獨樂之燕居始姑從於雅志安陽畫錦之
榮事終弗遂於牢辭即故里以開藩護陪
京而作牧江山震疊父老歡呼小煩尊俎
之籌益壯盤盂之勢遂膺渙號還陟鼎司
某一遠台符再周歲紀龍墀奉對首叨特
達之知螭陛記言更自薦揚之致逮右府
出疆之日寔西垣去國之時瞻蠲首於江
濱靡容奉謁委鸞牋於天上猶辱貽書自
憐不肖之軀正在大何之域丹書未削居
懷夙夜之憂綠野非遙坐阻寒溫之問豈
謂遷纍之至此會逢碩輔之來臨人謂斯
何嗟刺骨吹毛之已甚天其或者將息黥
補劓之可期仰繫大造之仁俯亮危衷之
切冰魚未躍長依萬頃之澄波巢燕來歸
寧靳千間之廣廈

代揔得居士上徐勣立

肅持虎節還自龍荒陟老上之庭國威坐

振曳尚書之履天眷彌隆仰繫徒御之勞
當有神明之助共惟國信尚書學尊一代
氣蓋諸公大丞相之家風流是似古君子
之操夷險弗渝方甲兵之問不至廟堂惟
忠信之人可行蠻貊一星北去三月南歸
喬木叅天諒切故都之感雪花如席可堪
胡地之寒茲奉對於清閑即叅華於近密
某棲遲薄宦景仰壯猶瞻十乘之元戎莫
遂前塵之拜蔭千間之廣厦知無凌雨之
憂

淮東漕魏郎中

京輦効官婁瞻逸軌邊亭奉指迺借餘光
豈曰爲寮於焉事長伏惟某官氣吞餘子
學眇諸儒未嘗枉尺以直尋真欲居今而
行古凜乎一代之名士備更險夷信矣中
興之吏師所至辦治嗟守闕之虎豹困橫
江之鱣鯨人謂斯何厥有至公之論天其
或者將爲大用之基殆聖政之更新借羣
賢而彙進雙旌引道亟分刺史之符一節
趣歸即覆郎官之錦簡注采厚寵靈游臻

陞內閣之新班專外臺之劇寄眷斯民俗
已熟教條舊所領州尚鬱去思之望及茲
開府當成不戒之孚仰窺訓詞即俟報政
某棲遲晚節漫浪此官方懷投効之歸空
切登車之志念昔已同之臭味于今復並
於官曹仰鄰燭之分輝庶山藜之不采隆
寒在候盛德對時冀妙毓於生經用丕迎
於景貺

新巢縣許宰

冠千佛之名早嘗慕義爲百乘之宰今乃
同僚雖共嘆於回翔聊自謀於親炙伏惟
某官才高雋軌文掞明庭凌雲之氣超然
固已薄蓬萊而不上激水之飛遠矣方當
運溟海以橫拳詎意荒城肯臨君子歷考
本朝之故事人謂斯何自結 明主之深
知公寧久此所冀亟來於行李庶能少奉
於周旋

荅吳將仕

屬厭俊聲夢想德宇丈人作牧適臨父母
之邦仲氏決科更參兄弟之契欲論交而

未敢乃盛禮以見投伏惟某官考信六藝以行其所知博極羣書而守之以約深厚爾雅追漢兩京之文直諒多聞得魯君子之益蓋將友天下之善士豈其顧吾儕之小人既見止而我心降喜可知也匪報也而永爲好俾利圖之

于湖居士文集卷第二十一

